

歷代名人小簡

下冊



PDC

商務印書館發行

我國古書經史而外。以子籍最爲廣博。古今各 家學術悉萃其中。但以卷帙浩繁。文字奧衍。學 編輯是書。依儒家、道家、法家、墨家、雜家、兵家之 次序。共選十八種。就原書擇尤採錄。詳悉評註。 并細加圈點。學者得此可以參考。可以自修。誠 文學家之寶筏也。茲將分冊價目列下。
晏子春秋 一角牛 荀予 二角
賈子新書 二角半
揚子法言 一角
老子 一角半
春秋繁露 一角半
列子 一角半
管子 一角半
韓非子 一角半
尸子 一角半
淮南子 一角半
孫子 一角半
子二冊 四角
商君書 一角半
墨子 一角半
呂氏春秋二冊 三角

註評
諸子菁華錄
合購全
部三元

合購全
部三元

己酉年正月初版
中華民國土年六月十八版

正代名人小簡二冊
(每部定價大洋貳角伍分)
(外埠酌加運費匯費)

前清宣統三年四月初三日稟部註冊五月十四日領到著字第186號執照

★此書有著作權翻印必究★

歷代名人小簡卷下

宋

林希謝人求哀辭書

希白嘗聞君子無苟於人。患其非情也。昔孔子猶曰。吾惡夫涕之無從而不脫。繆而弔亦苟也。希於某氏之葬爲非其故。不得與執绋之後。使爲之辭。其將何情以稱哀之。無從小人所不敢爲者。何足以辱命。

陳師道與秦少游書

師道字無己。性清介。章惇在樞府。將薦於朝。欲一見之。屬少游致意。答書拒之。及惇爲相。卒不往也。

辱書喻以章公降屈年德。以禮見招。不佞何以得此。豈侯嘗欺之邪。公卿不下士尙矣。乃特見於今。而親於其身。幸孰大焉。愚雖不足以齒。士猶當從侯之後。順下風以成公之名。然先王之制。士不傳贊爲臣。則不見於王公。夫相見所以成禮。而其弊必至於自鬻。故先王謹其始以爲之防。而爲士者世守焉。師道於公前有貴賤之嫌。後無平生之舊。公雖可。

見禮可去乎。且公之見招。豈以能守區區之禮乎。若昧冒法義。聞命走門。則失其所以見招。公又何取焉。雖然有一於此。幸公之他日成功謝事。幅巾東歸。師道當御。款段乘下澤。候公於上東門外。尙未晚也。拳拳之懷。願因侯以聞焉。

葉清臣與友人書

清臣啟。近遣一幹隨府抗持書。并錄覽二書。同詣鈐下。計已呈露。數日前追胥自彼還辱手教。歲不我與。忽焉隆夏。言念出處。光景載環。夷險均之。政如宿昔。天休蹈道。深篤報上忠純。樂職裕人。無有內外。顧爲簡書所縛。不得車騎相過。此可恨耳。生拙守退伏。闔族戶餐。閑齋晝眠。後池晚飲。惟性所適。頗無羈牽。長社櫟之扶疏。同海鷗之放逸。故人不爲念也。清臣頓首。

韓琦與友人書

記係歐陽永叔作。此當是與歐陽書也。

琦再拜啟。信宿不奉儀色。共惟興寢百順。琦前者輒以畫錦堂記。輕易上干。退而自謂眇末之事。不當仰煩大筆。方夙夜愧悔。若無所處。而公遽以記文爲示。雄辭濬發。譬夫江河之決。奔騰放肆。勢不可禦。從而視之。徒聳駭奪魄。烏能測其淺深哉。惟褒假太過。非愚不

肖之所勝。遂傳之。世大恐爲公文之玷。此又捧讀慙懼。而不能自安也。其在感著。未易言悉。謹奉手啟。敍謝不宣。琦再拜啟。

豐稷上張虞部書

稷觀天下無可責之民。或惡或善。或邪或正。或厚或薄。其風俗使然。治得其情。雖至惡可使遷善。雖至薄可使歸厚。治失其道。則反是。乃以民辭。吁何辜邪。近世尤可矜傷悼痛者。莫如農力耕而食不足。蠶而衣不足。凡上之人。少不加意。爲損不細。竊求其端。而嘗慕善治民者。旣師仰之。而又稱誦之。恨不得親見之。向守官於亳。則城父士民論議縣大夫更厯多矣。能究民情。恤民隱。無如吾張公也。聞閣下之民。想閣下之風。恨莫之見。不圖天幸。獲爲屬吏。今旣遇嗣皇下閔農之詔。深切丁甯。求其策於天下。又遇閣下能究極民弊之淺深。謹先託書以導志。如閣下賜一席。得論其大方。亦可以盡心焉。

歐陽脩與晏元獻公書

某啟。孟春猶寒。伏惟判府相公尊體動止萬福。前急足自府還。伏蒙賜書爲報。且承臨鎮之餘。日有林湖閒燕之樂。此乃大君子以道出處之方。而元老明哲。所以爲國自重之意也。幸甚。幸甚。有魏廣者。好古守道之士也。其爲人外柔而內剛。新以進士及第。爲榮陽主

簿。今因吏役至府下。非有它求。直以卑賤不能自達。欲一趨門仞而已。伏惟幸賜察焉。不備。某再拜。

歐陽脩與晏相公書

晏相公名殊。慶歷中由同平章事降工部尚書。知潁州。時歐公方爲河北都轉運使。故書中有接壤相交語。

伏念曩者相公始掌貢舉。脩以進士而被選擇。及當鈞衡。又以諫官而蒙獎擢。出門館。不爲不舊。受恩知不爲不深。然而足跡不及於賓階。書問不通於執事。豈非飄流之質。愈遠而彌疎。孤拙之心。易危而多畏。勤常得咎。舉輒累人。故於退藏。非止自便。今者偶因天幸。得請郡符。問遺老之所思。流風未遠。瞻大邦之爲殿。接壤相交。因得自伸懇惓之誠。庶幾少贖曠息之責。伏惟相公朝廷元老。學者宗師。尙屈蕃宣。每膺圖任。伏惟上爲邦國倍保寢興。企望旄麾。無任激切。

歐陽脩與程文簡公

蒙頒寄佳醞。感愧非一。京師日苦俗狀。無復清思。臨觴之樂。未始有之。思去歲留奉清歡。不覺已朞年矣。柳湖陳之甘棠。思有所頌述。以遺陳人。爲他日故事。以彰公之雅志。不惟

拙訥。直以多事忽忽殊所不暇。秋涼必償素願。得次詩榜之末。亦大幸矣。

歐陽脩與潁州通判楊虞部書

修敢茲者赴郡假塗久留賓次過承眷與日接宴言。遽此睽違實增感戀。但以柂車之始視職方初雖云陋邦粗有人事加以大暑遂成病軀。日夕之間方思布款急遽之至先以惠音且承別來福履清勝脩以衰朽得以退藏如夙昔之所聞皆少過於其實惟寂寞之爲樂須漸久而益佳餘非悉談更冀多愛。

歐陽脩答宋咸書

脩頓首白州人至蒙惠書及補注周易甚善世無孔子久矣六經之旨失其傳其有不可得而正者自非孔子復出無以得其真也傳者之爲學博矣而又苦心勞神於殘編朽簡之中以求千歲失傳之繆茫乎前望已遠之聖人而不可見杳乎後顧無窮之來者欲爲未悟決難解之惑是真所謂勞而少功者哉然而經非一世之書也其傳之謬非一日之失也其所以刊正補緝亦非一人之能也使學者各極其所見而明者擇焉十取其一百取其十雖未能復六經於無失而卓如日月之明然聚衆人之善以補緝之庶幾不至於大謬可以俟聖人之復生也然則學者之於經其可已乎足下於經勤矣凡有所失無所

不欲正之。其刊正補緝者衆。則其所得亦已多矣。修學不敏明。而又無彊力以自濟。恐終不能少出所見。以補六經之萬一。得足下所爲。故尤區區而不能忘也。

歐陽脩與黃校書論文章書

脩頓首啟。蒙問及邱舍人所示雜文十篇。竊嘗覽之。驚歎不已。其毀譽等數短篇。尤爲篤論。然觀其用意。在於策論。此古人之所難工。是以不能無小闕。其救弊之說甚詳。而革弊未之能至。見其弊而識其所以革之者。才識兼通。然後其文博辨深切。中於時病。而不爲空言。蓋見其弊。必見其所以弊之因。若賈生論秦之失。而推古養太子之禮。此可謂知其本矣。然近世應科目文詞。求若此者。蓋寡。必欲其極致。則宜少加意。然後煥乎其不可禦矣。文章繫乎治亂之說。未易談。況乎愚昧。惡能當此愧畏愧畏。修謹白。

歐陽脩與蔡端明書

蔡公名襄。字君謨。爲端明殿學士。

脩啟。修以衰病餘生。蒙上恩寬假。哀其憇至。俾遂歸老。自杜門里巷。與世日疎。惟竊自念。幸得早從當世賢者遊。其於欽嚮德義。未始少忘於心耳。近張寺丞自洛來。出所惠書。其爲感慰。何可勝言。因得仰諭。起居喜承宴處。優閑履况。清福春候。暄和更冀。爲時愛重。以

副指紳所以有望者。非獨田畝垂盡之人區區也。不宣修再拜。

歐陽脩與元珍學士書

脩啟。氣候不常。承動履清安。辱簡誨存問。感愧。脩拙疾如故。然請外。非爲疾。亦與諸公求罷。而從容於進退者異也。諒非遂請不能已。然亦必易遂也。承見諭。敢及之修頓首。

歐陽脩與韓忠獻王

脩頓首再拜啟。仲秋漸涼。伏惟觀察太尉尊候動止萬福。脩至愚極陋。不足以獻思慮於聰明。至於脩記以問起居。則當大君子憂國之時。又非宜輒干視聽。是以書牘之禮曠絕逾年。然而千里之外。威譽之聲。日至京師。如在耳目。可以見作鎮方面。協動羌戎。撫循之間。優有餘裕。此脩不勝西首企望。拳拳之誠。私自爲慰者也。伏念脩材薄力弱。不堪世用。徒能少以文字之樂爲事。而國家久安於無爲。儒學之士。莫知形容。幸今翦除叛羌。開拓西域。紀功耀德。茲也爲時。惟俟凱歌東來。函馘獻廟。執筆吮墨。作爲詩頌。以述大賢之功業。以揚聖宋之威靈。雖曰儒焉。亦區區之鄙志也。謹奉手啟咨問。伏惟俯賜鑒察。謹啟。

歐陽脩與韓忠獻王

某頓首啟。近因州吏詣府請絢。曾拜狀急足。至時辱手書爲誨。伏審履此凝寒。台侯萬福。

豈勝慰忭之誠。某此藏拙。幸今歲淮甸大雪。來春二麥有望。若人不爲盜。而郡素無事。何幸如之。惟尸祿端居。未能報國。此爲愧爾。瞻望旌棨。惟願爲國自重。以副禱頌。

歐陽脩與韓忠獻王

某再拜啟。山州窮絕。比乏水泉。昨夏秋之初。偶得一泉於州城之西南。豐山之谷中。水味甘冷。因愛其山勢回抱。構小亭於泉側。又理其傍爲教場。時集州兵。弓手閱其習射。以警饑年之盜。間亦與郡官宴集於其中。方惜此幽致。思得佳木美草植之。忽辱寵示芍藥十種。豈勝欣荷。山民雖陋。亦喜邀遊。自此得與郡人共樂。實出厚賜也。愧刻愧刻。

歐陽脩與韓忠獻王

慶歷中。魏公嘗以資政殿學士知揚州。後歐公由滁徙揚。故其語如此。

某頓首啟。自去春初到維揚。嘗因蔡中孚人行奉狀。自後區區不覺踰歲。卽日春暄。不審尊侯動止何似。某昨以日疾爲苦。因少私便。求得汝陰仲春初旬已超官所廣陵。嘗得明公鎮撫。民俗去思未遠。幸遵遺矩。莫敢有踰。獨平山堂占勝蜀岡。江南諸山。一日千里。以至大明井。瓊花二亭。此三者拾公之遺。以繼盛美爾。汝陰西湖天下勝絕。養愚自便。誠得其宜。然尸祿苟安。何以報國。感愧感愧。邊防之事。勤繫安危。伏惟經略之餘。爲國自重。

歐陽脩與韓忠獻王

某啟。冬候凝寒。伏惟某官尊體動止萬福。十二日所遣人至。伏承賜書。誨諭勤勤。且榮且
感。嗣以近製石本俾之拭目。信所謂未有不求而得之者。則前之干請誠不爲非也。惶恐
惶恐。公之德業固已偉然於當世矣。而今又以文章筆札垂示不朽。伏讀展玩之際。因思
窮邊武俗耳目乍此炤耀。其喧傳驚動。宜如何哉。後世之見者。想公爲人魁傑雄偉。又宜
如何哉。說者謂天不以全美賦人。某不信也。某自夏入秋。苦於親疾。以故久不脩問。謹因
人還附此爲謝。伏惟幸察。

歐陽脩與韓忠獻王

某頓首。啟。秋暑尙繁。不審三司尚書尊體動止何似。伏覩制書以天下之計。資天下之才。
雖未足以施夔稷之業。致堯舜之道。以興至治。以副具瞻。而天災水旱之時。民困國貧之
際。上有以寬旰食之憂。下有以救饑寒之急。此縉紳之君子。閭巷之愚民。所以聞命之日。
欣歡鼓舞。而引首北望。惟恐來朝之緩也。脩言不足信於人才。不足用於世事。有不得已。
而未能引去。徒與衆人同其喜慰。伏計大旆卽日在塗。伏惟爲國自重。謹奉啟咨候不宣。
歐陽脩與韓忠獻王

蒋之奇爲御史。上章劾公帷薄不脩。神宗鑒其諱。立黜之。奇公亦力求退。遂出知青州。

某啟。不侍台席。忽復彌旬經節。伏承動履清福。杜門俟命。已上三表。便值休假。方欲旦夕馳布懇誠於左右。忽辱惠翰。感慰兼深。某去就之際。不惟果於自決。而相知者皆勉以必去不疑。亮公見愛素深。意必不殊也。比來賴君相之明。爲之辨別。皎然明白。中外無所疑惑矣。則某之引去。不嫌稍速。所推恩禮。不必過優。使災難中。遂逃禍咎。而保安全於始終。蒙德不淺矣。區區所欲述者此爾。伏惟幸察。

歐陽脩與富文忠公

某頓首白。彥國自西歸。於今已踰月。無由一致書。蓋相別後。患一大疽。爲苦久之。不暇求西人行者。然亦時時有客自西來。獨怪彥國了無一書。又疑其人不的。於段氏僕夫來致幾道書。此人最的。宜有書。又無然後果可怪也。始與足下相別。時屢邀聖俞語。謂書者。雖於交朋間。不以疏數爲厚薄。然旣不得羣居。相笑語盡。心有此。足以通相思。知動靜。是不可忽苟。不能具寸紙數行。亦可易致。則可頻致。猶勝都不致也。當時相顧。切切用要約如此。謂今別後。宜馬朝西而書。夕東也不意。足下自執牛耳。登壇先歛。降壇而吐之。何邪。

平生與足下語。思欲力行者。事何限。此尺寸紙爲俗累牽之。不能勉強。嚮所云云。使僕何望哉。洛陽去京爲僻遠。孰與絳之去京師也。今尙爾。至絳又可知矣。自相別後。非見聖俞無一可語者。思得足下一書。不啻饑渴。故不能不忉忉也。秋暑差盛。千萬自愛。

歐陽脩與王文公

某再拜相別。忽焉遂見新歲。中間嘗一得附書。其如忽遽不盡鄙懷。於今猶以爲恨。雖然。遂使不忽遽。區區之懷。亦不能盡也。賢弟來得相見。備審動止。卽日春寒。奉太夫人萬福。喜慰無限。賢者不能留之朝。衰病者不得放去。皆失其分。歸咎何所。某自新春來。日益昏耳。亦不聰。大懼難久於筆硯。平生所懷。有所未畢。遂恐爲庸人以死爾。其他細故。不足道。惟奉親自愛。

歐陽脩與吳正獻公

某啓。公私多故。久闕奉狀。辱書承經。暑動履清和。併深慰懲。近審將漕京西。但欣按部過都。當遂瞻見。亦承曾有章奏。必難遂高懷。莫且勉就否。某自春涉夏。以小兒女多病。不無憂撓。加以待罪碌碌。不知所爲。情緒蕭索。無復前日。惟握手一笑。庶幾尙慰衰殘。豈勝企望也。未聞盛暑。爲時自重。人還草率爲謝不宣。

歐陽脩與吳正肅公

某啓。自大旆東出。忽復踰時。春氣猶寒。竊承動履清勝。卽約臨行。少留會話。終不克遂至。今爲恨。東土雨雪不愆。年豐俗阜。爲郡之樂。想亦無涯。某衰病日增。勉強碌碌。卒無毫分。以塞咎責。奈何。奈何。前日賞花釣魚。獲侍清宴。自景祐三年。逮今二十六年。獲見盛事。獨恨長文不在爾。嚮暑政暇。惟以時日自愛。因風惠問。以慰曠渴。

歐陽脩與吳正肅公

某啟。暑伏已深。不審台候。勤履何似。脩赴職已旬餘。幸歲豐盜賊衰息。地僻人事稀。簡塞拙之迹。臨禍獲全。荷德已多。而又假以寬閑之處。俾養衰病之餘。其受賜亦不淺矣。昨過潁尾。蓋十五六年不到矣。而風氣之變。物產益佳。巨蟹鮮鯛。肥魚香稻。不異江湖之富。故毫雖名郡。而歸思不可遏也。固不待巢成而斂翼矣。公方上副聖君眷委之重。下爲善人良士所賴。惟爲國自重。以副區區不宣。

歐陽脩與馮章靖公

歐公性好金石。所至徵求。故有是語。某啓。承惠寄碑刻。旣博而精。多所未見。寡陋蒙益。而私藏頓富矣。中年早衰。世好漸薄。獨

於茲物厥嗜尤篤而俗尚乖殊每患不獲同好凡如所惠僅得二三固已爲難而驟獲如是之多宜其如何爲喜幸也濟叔公議猶屈乃吾徒之責未嘗少忘於懷而造物者第與衆人同爲嗟歎而已豈賢人君子亨否有命殆非人力能致邪雖然敢不竭力辱諭感愧感愧承專遣人至數召問其還期每云有故未歸遂且於郵中附此俟渠行別當奉狀也

歐陽脩與執政

神宗初年公以兵部尙書知青州旋改宣徽南院使判太原府力辭不赴

某再拜啓仲夏炎毒伏惟台候萬福某以官守居外具瞻之地非時不敢通問今迫以懇惄不能自默某衰病累年中外具察不待煩言自去冬漸難勉強遂有壽陽之請而朝恩未許間以接奉春陽攻注眼目服藥過度渴淋復作遂不能支自三月下旬在假亦兩會奏知不期於病告中忽蒙此恩選事出意外莫不驚憂竊意朝廷必以居東逾歲別無大過遂以爲可委爾其如東州祗是尋常一大郡無兵馬無邊事又幸豐熟其如老病諸事曠廢處自知極多而過往不察其詳反以廢職爲少事此其可笑者也并晉一路外鄰二敵使某不病亦不敢當況尪悴不能策勵已具劄子細陳乞免此誤恩敢望台造察其誠實其餘區區常談難信之語更不復云惟早賜允俞免再三煩瀆則大造也不宣

歷代名人小簡

歐陽脩與滕待制

滕子京名甫時謫守巴陵修岳陽樓范希文岳陽樓記卽爲子京作也

某頓首自夷陵之貶獲見於江寧逮今十年而執事謫守湖濱某亦再逐淮上音塵靡接會遇無期則人事之多端勞生之自困可爲歎息何所勝言急步忽來惠音見及伏承求郵民瘼宣布詔條去宿弊以便人興無窮之長利非獨見哲人明達之量不以進退爲心而竊喜遠方凋瘵之民獲被愷悌之化示及新堤之作俾之紀次其事舊學荒蕪文思衰落旣無曩昔少壯之心氣而有患禍難測之憂虞是以言澀意窘不足盡載君子規模閟遠之志而無以稱岳人所欲稱揚歌頌之勤勉強不能以副來意媿悚媿悚秋序方杪洞庭早寒嚴召未間千萬自重

歐陽脩與劉原父

某啟自春首以來兒女輩疾病日益憂煎自顧無補於時而衰病日增咎責四至其何以堪之惟思春物爛然故都遺勝不可勝覽而公專有之猶恐厭飫所見不以難得爲惜也須知有不可得之者也賢弟亦稀相見蓋難得盡從容之適爾公自至鎮一嘗辱問遂絕惠音不知何嫌遽爾見疎也西齋塵土無復人迹偶因連日假故試尋筆研略布此誠以

此亦可見其爲貺也。其他俗事可惜。不復多道。但布瞻企之勤爾。氣候猶未和暢。不知西路如何。惟爲國自愛。某祇拜。

歐陽脩與劉原父

某區區於此。忽復半歲。思有所爲。則方以妄作。紛紜爲戒。循安常理。又顧碌碌可羞。不知何以教之。哀其不逮。實有望於公爲多也。至於常檢拘攀。野率之性。尤以爲苦。然勢難輕動。甫及年歲。得去爲幸也。蔡君謨自南歸。幡然一叟。相見惟互相驚歎而已。西齋自去冬逮今。遂不復啟。其他可知也。故都多登臨之勝。新詩醉墨。時以爲惠。以忘俗惡之態。於理似未爲害。不知何避而何嫌。鄙懷千萬。居常思欲鉅細布之。臨紙則復茫然。惟慎夏愛護。

歐陽脩與劉原父

某啟。昨賢弟行。嘗奉狀屬合宮大禮。前後事叢。遂闕致問。昨日進奏院送九月十五日所寄書。竊承動履清勝。兼復惠以古器銘文。發書驚喜。失聲。羣兒曹走問。迺翁夜獲何物。其喜若斯。信吾二人好惡之異如此。安得不爲世俗所憎邪。其窮達有命爾。求合世人以取悅。則難矣。自公之西。集古屢獲異文。并來書集入錄中。以爲子孫之藏也。幸甚。幸甚。歲律漸寒。惟爲時自重。